



## **SIARAN MEDIA**

### **UDA CERIAKAN GOLONGAN ASNAF DI KAWASAN WANGSA MAJU**

*Sumbangan Bernilai RM112,000 Diserahkan Kepada Golongan Yang Memerlukan*

**Wangsa Maju, 10 Jun** – Sempena bulan Ramadan yang mulia ini, umat Islam digalakkan untuk memperbanyakkan amalan bersedekah dan melakukan amal kebajikan. Selain berkongsi kenikmatan bersama golongan yang kurang bernasib baik, ganjaran yang diterima adalah berlipat ganda berbanding bulan lain.

UDA Holdings Berhad (UDA) juga tidak melepaskan peluang menghulurkan sumbangan dan berbuat kebajikan pada Ramadan yang penuh keberkatan ini. UDA telah menganjurkan program 'Indahnya Ramadan @ Wangsa Maju' 1438H anjuran bersama Masjid Usamah bin Zaid dengan kerjasama dari Badan Kebajikan Kakitangan UDA (BKKU) dan juga Badan Didikan Agama Islam (BADIM).

Majlis yang berlangsung di perkarangan Masjid Usamah ini merupakan julung kali diadakan oleh UDA di masjid tersebut yang bertujuan untuk mengimarahkan masjid pada bulan Ramadan, bulan bagi umat Islam sejagat meningkatkan ketakwaan dan keimanan kepada Allah Subhanahu Wata'ala dengan mengharapkan ganjaran pahala yang berlipat ganda. Di samping itu, ianya juga merupakan platform UDA mengeratkan lagi ukhwah di antara UDA dan penduduk Wangsa Maju, khususnya golongan bella untuk turut serta dalam program kebajikan yang dianjurkan.

Program 'Indahnya Ramadan @ Wangsa Maju' ini telah bermula seawal jam 8.00 pagi dengan acara bergotong-royong memasak bubur lambuk. YBhg. Datuk Seri Dr Mohd Shafei Abdullah, Pengerusi UDA merangkap Ketua UMNO Bahagian Wangsa Maju, warga kerja UDA serta penduduk Wangsa Maju berganding bahu menyediakan 8 periuk bubur lambuk untuk diagihkan kepada semua yang hadir pada hari tersebut. Turut hadir sama memeriahkan lagi majlis tersebut adalah YBhg. Tuan Haji Abdul Aziz, Pengarah JAWI; YBrs. Encik Wan Yusuff Wan Ishak selaku Pengerusi Masjid Usamah bin Zaid serta YBhg. Datuk Ahmad Abu Bakar, Pengarah Urusan Kumpulan UDA.

Program 'Indahnya Ramadan @ Wangsa Maju' seterusnya diikuti dengan Majlis Penyampaian Sumbangan berjumlah RM100,000 kepada 1,000 golongan asnaf dari kawasan sekitar Parlimen Wangsa Maju. Pada masa yang sama, UDA turut menceriaikan 60 orang anak-anak asnaf dengan membawa mereka membeli pakaian dan baju raya bernilai RM200 setiap seorang di AEON Wangsa Maju sebagai tanda keprihatinan UDA dalam menunaikan tanggungjawabnya kepada masyarakat setempat.

Menurut Datuk Seri Dr Mohd Shafei Abdullah, "UDA mengambil pendekatan dengan mengadakan program 'Indahnya Ramadan @ Wangsa Maju' ini untuk mengeratkan lagi hubungan yang terjalin di antara UDA dan juga penduduk Wangsa Maju. Ianya juga merupakan wadah terbaik untuk menzahirkan program kemasyarakatan UDA kepada golongan yang kurang berkemampuan. UDA amat berharap dengan sumbangan ikhlas ini akan membawa keceriaan kepada anak-anak yatim dan golongan asnaf menjelang sambutan Hari Raya Aidilfitri yang menjelang tiba." Beliau juga menyeru semua pihak yang diberi kelebihan oleh Allah S.W.T agar tidak melupakan golongan yang kurang bernasib baik.

"Terima kasih saya ucapkan kepada semua pihak yang terlibat dalam menjayakan program ini dan saya yakin malah percaya dengan terlaksananya program ini, sedikit sebanyak akan meningkatkan ibadah kita pada bulan Ramadan.

Saya juga berharap, pengisian program ini dapat menyuntik semangat dan memperkukuh azam kita untuk menjadikan Ramadan sebagai pemangkin untuk membina ketakwaan dan sekaligus melipatgandakan segala usaha ke arah meningkatkan pencapaian diri dan organisasi demi kesejahteraan bersama," ujar beliau lagi.

Bagi menambahkan keberkatan program tersebut dan sebagai santapan kerohanian, alunan bacaan Al-Quran telah diperdengarkan dan disusuli dengan Ceramah Perdana yang disampaikan oleh penceramah jemputan. Ia diikuti dengan jamuan berbuka puasa serta menunaikan solat Maghrib dan Isyak berjemaah, tarawih dan berakhir dengan program moreh.

### **TAMAT**

#### **MENGENAI UDA HOLDINGS BERHAD**

UDA Holdings Berhad (UDA), merupakan salah satu organisasi pembangunan hartanah dan pengurusan aset yang mampan dan terkemuka di negara ini. Aktiviti utama syarikat termasuk pembangunan tanah, pengurusan harta dan fasiliti, kompleks beli-belah serta industri hospitaliti. UDA telah bertapak kukuh dalam membentuk dan memodenkan Kuala Lumpur, Lembah Klang dan bandar-bandar utama lain di Malaysia sejak tahun 1971.

Untuk maklumat lanjut mengenai UDA, sila layari laman sesawang kami di [www.uda.com.my](http://www.uda.com.my).

Sebarang pertanyaan media, sila hubungi:

- Norazuana Abdullah (Wana) | [norazuana@udanet.com](mailto:norazuana@udanet.com) | +6019 223 9153
- Nor Akmalia Husaini (Intan) | [akmalia@udanet.com](mailto:akmalia@udanet.com) | +6012 710 1102

Bahagian Komunikasi Korporat Kumpulan

UDA Holdings Berhad

Tingkat 6, Blok Menara, Kompleks Pertama,

Jalan Tuanku Abdul Rahman, 50100 Kuala Lumpur.

Tel : +603 2730 8500 | Fax : +603 2731 2855